

INFO US\$AHAWAN

usahawan pemacu ekonomi mapan





Perusahaan Erawadee: Menyelami Dunia Perubatan Tradisional Thailand

Suzila Mat Salleh, Siti Fatimah Mardiah Hamzah, Wan Nur Nalisa Burdhan, Nurulnadwan Aziz, Amirudin Mohd Zani, Sholehah Abdullah, Ramizatunnisah Jais, Nik Fazlin Hiriyati Nik Jaafar, Marha Abdol Ghapar dan Nasiha Abdullah.

Fakulti Pengurusan dan Perniagaan, Universiti Teknologi MARA Cawangan Terengganu.

Emel koresponden : suzilamsalleh@uitm.edu.my

Pada 30 Jun yang lalu, ahli Fakulti Pengurusan dan Perniagaan telah membuat kunjungan akademik ke Pattani dan Hatyai, Thailand. Perancangan telah dibuat untuk membuat lawatan ke beberapa tempat menarik di Pattani dan Hatyai. Lawatan tersebut bertujuan untuk memperluaskan pengetahuan kami mengenai budaya dan perusahaan tempatan. Ini termasuklah pendekatan alternatif dalam bidang kesihatan dan perubatan. Antara tempat kami kunjungi ialah Erawadee, sebuah syarikat terkenal dalam penghasilan minyak urut dan ubat tradisional herba Thailand.

Sebaik tiba di pusat Erawadee, kami disambut dengan mesra oleh kakitangan syarikat yang profesional dan berpengetahuan luas dalam dunia perubatan berasaskan herba. Satu sesi taklimat telah diadakan untuk memperkenalkan sejarah dan latar belakang syarikat, selain memberi penerangan mengenai pelbagai jenis produk kesihatan yang dihasilkan. Produk-produk ini terdiri daripada minyak urut, balm herba, krim sapuan, ubat sapu panas dan sejuk, serta kapsul herba untuk pelbagai tujuan kesihatan seperti merawat sakit sendi, migrain, masalah penghadaman, dan meningkatkan imuniti tubuh. Selain itu, terdapat juga produk kecantikan dan penjagaan diri berasaskan herba turut dikeluarkan.



Syarikat Erawadee berkembang pesat sejak penubuhannya dan kini mempunyai lebih 20 cawangan di seluruh Thailand, termasuk di kawasan pelancongan utama seperti Phuket, Bangkok, dan Chiang Mai. Produk mereka kini telah berjaya dipasarkan ke lebih 30 buah negara, termasuk Malaysia, Jepun, Korea Selatan, dan Jerman. Salah satu pencapaian membanggakan Erawadee ialah apabila mereka berjaya menerima pelbagai pengiktirafan antarabangsa dalam kategori kualiti dan inovasi produk herba.

Sepanjang lawatan, kami turut diberi peluang mencuba beberapa produk popular seperti minyak urut serai wangi dan balm herba panas. Pengalaman ini membuka mata kami tentang potensi besar industri herba tradisional yang selama ini mungkin kurang diberi perhatian. Rata-rata ahli fakulti turut membeli produk yang berkaitan dengan minyak balm untuk dibawa pulang ke Malaysia.



Kesimpulannya, lawatan ke Erawadee telah memberikan kami satu pengalaman yang sangat bermakna. Ia bukan sahaja menambah ilmu tentang perubatan tradisional, malah menyuntik inspirasi tentang betapa hebatnya dunia keusahawanan di mana herba tradisional juga boleh dijadikan sebagai sumber ekonomi apabila diusahakan secara komersial dengan penuh dedikasi dan profesional. Kami amat menghargai peluang ini dan berharap Malaysia juga dapat melahirkan usahawan sedemikian yang dapat berkembang hingga ke peringkat antarabangsa pada masa akan datang.

